

MOELETSI OA BASOTHO

M5.00

PARARE DOMINO PLEBEM PERFECTAM



**Lesotho le matlafatsa
tšireletso**

2

**O khutlisetsoa
ke lekhotla**

5



MONONGOAHA HA SE NGOAHOLA

CHRISTMAS SALE

**SPECIAL
OF THE YEAR**

KE NAKO EA THABO, KE NAKO EA LIFELA TSA THABO!

Re keteka tsoalo ea Ngoana Jesu ka lipina tsa thoriso. Fumana
Buka ea **Lifela tsa Bakriste (Keketso)** kajeno, u kopane le
Bakriste ba bang ho bina liharepa tsa thabo ka nako ena ea
nyakallo ea Keresemese.

Contacts: 27 350 562/ 57396597

Mazenod BOOK CENTRE

**M175.00**

MOELETSI

Lokisang boitšoaro

Lesotho le matlafatsa tšireletso ea lijo

Nthabeleng Seitlheko

Muso oa Lesotho o amohetse ka molao setsi sa sejoale-joale sa polokelo ea lijo-thollo le polokelo ea lihlahisoa tsa temo, ho tsoa ho 'Muso le sechaba sa China, ka la 17 Tšitoe monongoaha.

H'a amohela setsi sena, Letona la tsa Machabeng, Mohlomphehi Lejone Mpotjoane o boletse hore polokelo ena ha se moaho feela, empa ke letšoao la tšepo, mamello le bokhoni ba ho ikamahanya le maemo sebakeng sa lihoai le malapa a Basotho. O re ke pono e kopanetsoeng ea bokamoso bo atlehileng, bo tsitsitseng le bo sireletsehileng ka lijo sebakeng sa Lesotho.

O bontšitse kananelo e kholo ho 'Muso le Sechaba sa China, 'me a re setsi sena ke bopaki bo hlakileng ba setsoalle se sa feleng le bonngoe bo matla lipakeng tsa linaha tsena tse peli le baahi ba tsona.

Letona le boetse la totobatsa hore morero ona ke pontšo e hlakileng ea tšebeliso ea Linaha tsa Boroa (South-South Co-operation), hape o bontša sepheo sa Forum on China-Africa Co-operation (FOCAC) sa ho kenya tšebetsong merero e sebetsang le e amang bophelo ba baahi ka kotloloho.

Tona-Kholo Samuel Ntsokoane Matekane o hatelletse hore temo e ntse e le motheo oa moruo oa naha le bophelo ba lichaba tsa mahaeng. O itse ka lilemo tse ngata, lihoai li tobane le tahlehelo e kholo ea kamor'a ho kotula, ka lebaka la mongobo, likokoanyana le khaello ea meaho e nepahetseng ea polokelo.

Ntle le libelisano tsa temo tse limilione tse 35 tse amohetsoeng ka Mphalane selemong sena, setsi sena se secha sa polokelo se tla thusa lihoai ho boloka kotulo le peo ea tsona ka polokeho, ho buisana ka litheko tse molemo 'marakeng, le ho netefatsa hore litholoana tsa mosebetsi oa tsona li fepa sechaba selemo ho pota.

Puong ea hae, Letona la Temo, Kanetso ea Lijo le Phepo e Nepahetsemg, Mohlomphehi Thabo Mofosi o amohetse tšebetso ea China tabeng ea ho koetlisa bacha ba Basotho hore ba tsebe ho sebetsa le ho laola setsi sena sa polokelo ea lijo-thollo. O tsebisitse Monghali Young hore lipuisano lipakeng tsa Lesotho le China li se li qalile, ho kenyeletsa le ho lokisoa ha Tumellano ea tšebetso (Memorandum of Understanding) e tla tataisa tsamaiso le boikarabelo ba setsi sena.

'Muso oa Lesotho o fetisetse teboho e tebileng ho 'Muso le Sechaba sa China ka seatla se bulehileng le tšebeliso e



tsoelangpele ea ho matlafatsa tšireletso ea lijo, ntsetsopole ea

litsebo le ntsetsopole e tsitsitseng ea naha.

E hata ka lebathathaba

Nthabeleng Seitlheko

Mabatoa a kahlimo ho leshome a ngole-tse Komiti e Kholo ea Sechaba (AD) lengo-la ho hloka tšepo ho eona, ka le reng e mometse ha e re letho ka kholo le ntlafalo ea lekhohla. Litaba tsena li tiisitsoe ke e mong ea buellang balli, Molebatseng Makhata puisanong le Koranta ka la 17 Tšitoe monongoaha.

A mang a mabaka ao ba leng seboko ka ona ke ho se tsoare liboka tsa molao tse thusang boetapele ba Mabatoa ho kopana le Komiti e Kholo e le ho rarolla mathata a tobileng lekhohla ho latela temana ea 3.3 Seboka sa Boetapele, 3.4 Seboka sa Maa-no, 3.7 Seboka sa Mekhatlo ea Basebetsi haholo-holo nakong ena eo Mekhatlo e fapakaneng ea Sechaba e nang ka Puso eo ba leng karolo ea eona.

Ho se eletse moetapele pehong le telekong ea liofisiri tsohle tse behoang sepolotiki moo lekhohla le leng pusong ho latela Temana ea 5.2 (a) Ho itebatsa litšiea tse tharo tseo lekhohla le thehiloe khahlanong le tsona eleng ho fetola Moetapele Sehloholo.

Ho se thuse ho bopa Lekhotla Mabatoong, ho se tataise le ho se hlocomele tšebetso ea Mabatoa 5.2 (c) le ho se qape le hona ho ntsetsapele mosebetsi oa lekhohla e ka phethahatsang merero ea Lekhotla 5.2 (f).

Ho iphanyetsa hore lekhohla la bona le thehiloe khahlanong le bobolu hoo moetapele oa melheng le ba bang bathehi ba neng ba itokolle botoneng ba lla ka bobolu ba maketse haholo ha ba utloa Komiti e Kholo ka ho phatlalatsa Basotho ka phatlalatsa hore ha ba ikamahanya le litaba tse ntseng li tšohloa ke Komiti ea Paramente ea PAC eo e leng eona feela Komiti e hlahang kahar'a Molao-theo oa Naha.

Ho se hlomphe melao ea Khiri le Bosebeletsi ba Sechaba e Tsamaisang Bahlanka ba Sechaba ka ho fa Mongoli e Moholo Mosebetsi oa 'Muso ebe h'a itokolle Ofising ea Bongoli Bo Boholo ba lekhohla.

Ho se fe Mothehi oa Lekhotla monyetla oa ho bua le Ma-AD sebokeng se neng se tsoaretsoe Mpharane ka la 2 Pulungoana 2025. Taba ena ke sesupo se hlakileng sa hore Komiti e Kholo ha e'a ikemisetsa ho loanela bonngoe, khotso le kopano ea Ma-AD e leng seo Lekhotla la Kopano ea Sechaba le se emelang.

Mabaka ana a tekiloeng ka holimo mona a bontša bofokoli ba Komiti e Kholo bo kotsi bo ka behang lekhohla tloko tsing. Ka hona ba entse qeto ea ho hloka tšepo ho eona e le mohato oa ho sireletsa lekhohla.

Ho hapella setho ho koala sekheo sa Komiti e Kholo ho sa natsoe hore litaba tsa setulo se joalo li se li le Makhohla a molao, 'me sena ke sesupo sa ho se hlomphe molao oa naha, ba nka molao oa motheo oa lekhohla o le ka holimo ho oa Naha.

Ho leleka Litho tsa Lekhotla ho sa lateloa litemana tsa Motheo tsa 9.2.1 (a) (b) i, ii, iii, le (c) tse amanang le matla le mesebetsi ea Komiti ea Boitšoaro e leng se bakeseng lekhohla ho sesa kah'ara linyeoe ka baka la ho tsoara litaba ka bohlasoa ka thoko le ho ikeletsa ka molao oa Motheo.

Phala ea AD, Litaba Taeboso o hlalositse hore ba lumela ho tsamaiso ea molao oa lekhohla, ka lebaka lena ba tla lula e le Komiti e Kholo ho bona hore li'a lokisoa. A re mabatoa ana a ba ngoletseng a mang a mahlano h'a na litempe ka hoo ba lokela ho lokisa taba e joalo.

O re seo ba se hlohang ke hore feela ba sebetse ba ipapisitse le molao oa motheo, 'me moo litlalebo li leng teng re rarolle litaba ka lipuisano.

Lihloai li hlokomelisoa ka Lefu la Tihako le Molomo (FMD) le hlalosoang le bakoa haholo ke mocheso, 'me lona le hlasela likhomo le likhutšoane; linku le lipoli. Lekala la Temo, Kanetso ea Lijo le Phepo e Nepahetseng le se le ntšitse Sehlopha sa Tšebeliso sa Mafapha a Mangata se tla thusa sechaba ho loantšana le lefu lena. Ka hona balisana naheng moo ba koptjoa ho tlalehela bo-ramehlape ha ba bona matšoao ao ba sa a tloaelang liphoofolong haholo makhopho. Lesotho le tlalehoa le se na lefu lena empa le le kotsing kaha le le haufi haholo le Naha ea Afrika Boroa. Sechaba sa Basotho ha re hlokomelisaneng ka lefu lena le tla qeta mehlape ea rona, e se e ntse e fokola. Ea utloileng a hasa molaetsa hohle a se nke hore bohle b'a tseba.

Ka lehlakoreng le leng 'Muso oa China o nehelane ka ntle ea polokelo ea lijo-thollo ho Naha ea Lesotho e tla thusa lihoai haholo tabeng ea poloko, kaha li ile tsa lahlehela le lijo nakong e fetileng. Lijo li ne li hlaseloa ke likokoanyana le mongobo ka lebaka la khaello ea meaho e nepahetseng. Ka hona bokamoso bo chabile ho lihoai kaha li se na ho tsoenyeha kamor'a ho kotula.

Sechaba sa Quthing se thabile haholo hobane se tla aheloa marokho ao khaho ea ona e lebeletsoeng ho qala ka khoeli ea Pherekhong isao, ebe e nka bonyane likhoeli tse peli. Ena ke khatelopele ntlheng ea ho isa litšebeliso le lintlafatso sechabeng. Phetoho ea maemo a leholimo e tile ka lipula tse ngata haholo tse ileng tsa senya marokho a mangata, joale moo ho neng ho se marokho teng ke mathata. Ha lipula li nele baahi ba sitoa ho phetha mabaka haholo a amang lithoko tsa mantlha joaloka ho etela Litsi tsa Bophelo kapa ho reka lijo mabenkeleng. 'Muso o ntse o iteka ruri ho aha marokho a mangata monongoaha, 'me e se eka le libaka tse lebahileng li ka hopoloa haholo tse ka maluting.

'Muso oa Lesotho le oa Afrika Boroa ka boemeli ba eona e ile ea etela Morero oa Metsi oa Lihlaba tsa Lesotho (LHWP) Phase II, ka sepheo sa ho hlahloba tšebetso. Ho na le lintlafatso tse teng 'moho le liphepetso kaha matsoho ho lutla a sebetsang. Letona la Metsi le Bohloeki la Afrika Boroa le bontšitse ha ho na le moo ho nang le tiehiso ea tšebetso e lokelang ho lokisoa, kaha ba tsetetse chelete e ngata haholo morerong ona ho bona hore o'a phethahala. Har'a likatleho tse kholo tse ka suptjoang ke khaho ea boroko ba Senqu bo thabetsoeng haholo ke baahi hobane bo tla ka melemo e mengata haholo. Ka lilemo-lemo ba supa ha ba ne ba sitoa ho phetha mabaka a bona nakong ea lipula hobane mokhoa oa ho tsamaea o se bobebe, ka hona ba leboha haholo ka borokho bona. Ntho e thabisang haholo ke hore ha se khale ha borokho bo tla buloa semmuso kaha isao ka khoeli ea bobeli; e leng Hlakola baahi ba tla qalella ho phetha maeto a bona habobebe.

Lekhotla la Motse-Moholo Maseru (MCC) le ile la nka leeto ho hlahloba libaka tse boliseng ba lona, 'me le ile la fumana hore libakeng tse kang Makhoakhoeng, Ha Abia, Ha Matala le Masianokeng ho na le batho ba iphileng litša. Sena se pakahatsoa ke lipalo tse bonahalang li tšoahele litša; ka hona MCC e lemosa sechaba hore litša tse joalo ke tsa eona. Mang kapa mang ea li abileng o tlotsa molao, ka lebaka lena bohle ba rekiselitsoeng litša tseo ba itlalehe kapele-pele liofising tsa lekhohla. Joale Basotho bona ba se ba ipha litša hobane ba re li morung 'me ha ho motho ea tla hlokomela? Taba ena ke bothoto hobane ntle eona e tla bonahala.

Taba ea tlhokomeliso ea boipaballo nakong ea phomolo ea Matsatsi a Keresemese e se fetohile tloaelo feela, hobane ruri ho etsahala lintho tseo motho a ka li qobang haeba a ile a mamela 'me a nka likeletso. Ha ho motho ea hanetsoeng ho ithabisa, etsoe bophelo bo na le maemo a fapakaneng; kajeno u thabile hosane u'a lla. Empa ha u thaba u etse joalo ka boikarabelo u nts'o hopola hore hosane ho na le bophelo. Tlohelang ntho ena ea lona ea hore le'a iteboha; kapa motho a re o itlontlolla feela ha se habo kaha nakong ena ho etoa. Le senya lintho tse ntle ka boitšoaro bona ba lona bo hlephileng, 'me le nyontša le bana ho ba baholo. A k'u lokiseng mokhoa oa lona oa ho keteka, le tsebe ho fetoha mehlala e metle baneng ba lona.

MOLIMO A BOLOKE LESOTHO LE BASOTHO

Contacts: +266 28350 466

62600983 WhatsApp

Email: newsroom@moeletsiabasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

Editorial

Lesetsa Rakubutu

(+266) 6203 1949 / 58190670

EMAIL: editor@moeletsiabasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

57 665 038/ 68 216 271

Tšeliso Thakholi

58 540 853/ 63 480 404

Production Desk: 'Mateele Liqa



RE U

LAKALETSA

KERESEMESE E MONATE

LE MAHLOHONOLO

A SELEMO

SE SECHA



www.moeletsiabasotho.co.ls



MOELETSI O TŠEHETSA BACHA

Tšeliso Thakholi

Mosebetsi oa khoebo ea ho kuta moriri o tsebahala haholo e le oa batho ba bo-abuti. Haele batho ba bo-ausi bona ha ba tloaeleha haholo khoebong ena, empa ba tloalehile ka ho etsa mesebetsi e meng e kang ea ho loha moriri, ho khabisa sefahleho, makeup le ho kenya manala. Leha ho le joalo, morao tjena bo-ausi le bo-'m'e ba bonahala ba se ba etsa likhoebo tseo linakong tsa ho feta li neng li etsoa ke banna. Mofumahatsana Mercy Mopeli ke e mong oa bacha ba fokolang haholo ka palo ba banana ba ipabolang ka ho etsa nalane toropong e kholo ea Maseru ka ho theha khoebo ea ho khabisa le ho kuta moriri e bitsoang SW Studio e motseng oa Mohalalitoa haufi le lebenkele le leholo la Hi Fi City.

Kajeno re phura leshoetla le eena re ke re utloe ka tsa tšebetso ea hae mosebetsing ona oo a o etsang.

**A K'U BOBELLE
BABALI HORE NA
UENA U MANG LE
HORE MOSEBETSI OA
HAU KE OFE.**

Ke Mercy Mopeli haeso ke Seterekeng sa Leribe, empa hona joale ke sebetseba mosebetsi oo ke o ratang haholo ho feta mesebetsi eohle e leng oa ho kuta moriri. Ke 'nete ke ithutetse lintho tse amanang le ho etsa motho botle, tse kang ho loha moriri ka mefuta e fapakaneng, ho khabisa manala le li-makeup, empa ka khetha ena ea ho kuta hobane ke atleha ho sebeletsa batho ba bangata haholo ka letsatsi. Ho kuteng ke atleha ho sebeletsa batho ba ka bang 50 ka letsatsi, 'me ho loha ha se ntho e ka et-sahalang ha bonolo ho loha palo e kalo ka letsatsi.

**HO THEHA KHOEBO
EA HO KUTA**

Ho kuta ha se ntho eo ke tlohileng ke se ke re kea e rata empa lerato le leholo-holo la ho kuta le qalile nakong eo ke neng ke ntse ke sebetseba kahar'a khoebo ea ho etsa botle le ho khabisa manala. Batho bao ke neng ke sebetseba le bona ba ne ba kuta, ka hoo ka ba le lerato la ho kuta ka lebaka la hobane ka linako tse ling ha ke lutse le bona ke ba shebelletse ha ntse ba kuta ke ne ke atleha ho bona li-phoso tseo ba li etsang, ho fihlela re se re e-na le puo ea rona re le bang e ba hlokomelisang ho lokisa lipho-

so, baji ba litšebelsetso ba sa hlokomele letho. Ea e se e le moo lerato le tebileng la mosebetsi oa ho kuta le qalehang hona teng.

**QALEHO EA
TŠEBETSO**

Motho oa pele eo ke ileng ka qala ho mo kuta e bile e le matsatsing a Keresemese ke ngoan'a ngoanana kamor'a ho ithuta ho bana bao b'eso bao ke neng ke sebetseba le bona, feela 'na ke ne ke etsa mosebetsi oa ho etsa batho botle. O ne o khahle batsoali ba bangata eaba ba se ba batla hore ke kute bana ba bona. Ke hona moo ke ileng ka ithuta hore ho kuta ke talenta eo ke e fuoeng ke Morena Molimo. Ho tloha letsatsing leo eaba ke ithutile hore ke tseba ho kuta, 'me ka bona hore ke ona feela mosebetsi oo nka o sebetasang.

Ke qalile ke loha le ho kuta empa ka bona hore e bohlokoa haholo ke ea

ho kuta hoba e'a potlaka hape e sebetseba le moriri oa tiholeho ebile ha ho na litlamorao. Ka 'nete lerato la mantlha le ileng la etsa hore ke khethe mosebetsi oa ho kuta e le ona o nkang maemo a pele pelong ea ka ke hobane o etsa chelete kapele le ho etsa phaello e ngata.

**BAJI BA
LITŠEBELETSO**

Khoebong ena ea ka ke na le batho ba baholo haholo ba hlomphehang sechabeng ba re tšehelitseng ka ho tla kuta koano ka lebaka le mosebetsi o tsoileng matsoho oo re o etsang. Re qala pele ka ho tsoara baji ba rona ka ho ba amohela ka mofuthu le ho ba sebeletsa ka hlompheho le lerato. Har'a ba baholo bao re ba sebeletsang ba tsebahalang ke baruti, bahlomphehi matona, libapali tsa bolo tse kang Litšepe Marabe le libini tse kang Sannere le

Phoko ea Boroa le ba bang ba bangata.

Ke 'na ea neng a kuta motho eane oa 'National Wedding' abuti Malefetsane le batho ba bangata ba hlanelletseng sechabeng ba kang bo 'Makhubelu. Re mema batho bohle hore batle ba t'l'o fumana litšebelsetso tse makhetha tsa boleng.

**LIKATLEHO LE
LIQHOLOTSO**

Khoebo ena ea moriri e ntiselitse likatleho tse ngata haholo tse kang Talk Shop, leruo la likolobe, Miss Kitchen le likhoebo tse ling tse ngata. Ka 'nete ke na le boiphihlelo bo boholo ka lebaka la khoebo ea ho kuta moriri. Sena se bolela hore ke hirile bacha ba ka bang 12 ba fumanang moputso khoeli le khoeli. Ke boetse ke atlehele ho theha sekolo sa ho ruta bacha le batho ba baholo ho kuta. Ke se ke na le bacha ba bangata haholo

bao ke ba rutileng ho kuta, 'me ke khotaletsa bacha ho tla haholo-holo banana hoba mosebetsi ona ha se oa bo-ntate feela le banana ba ka o etsa molemong oa ho iphelisa. Ka 'nete e hlile ha ho na liqholotso mosebetsing oa ho kuta ke taba ea hore feela, e ka re ke mohollo hore ebe mosebetsi oa ho kuta o etsoa ke motho oa ausi kaha o tloaelehele o etsoa ke bo-abuti.

**KHOTHALETSO
HO BACHA**

Bacha ba eme ka maoto ba tle re t'l'o ba ruta mosebetsi oa ho kuta, 'me ba tsebe hore mesebetsi matsatsing a hona joale ha e sa khetholla hore na motho ke abuti kapa ausi bohle rea lekana ebile re na le matla a ho etsa ha feela re na le lerato le mamello. Bacha tlohong le tliil'o tla le ithuta ho kuta e le hore le lona le tsebe ho iphelisa, re tla le amohela ka mofuthu.



O busetsoa

ke lekhotla

Ba tla phetha maeto

Nthabeleng Seitlheko

Lekhotla la Bosebet-si le fane ka taelo ea hore 'Matha-bo Mokoko e leng mookameli ea lelekiloeng tšebetsong oa Setsi sa Lekhetso sa Lesotho(RSL), a khutlele mosebetsing. Litaba tsena li bile Lekhot-leng la Bosebetsi, ka la 17 Tšitoe monongoaha.

Litho tsa Boto ea RSL: Lindiwe Sephomolo, Tšire-



letso Mojela, Lerato Lerato, Rebecca Ralebakeng, 'Ma-monaheng Koenane, Liba-ko Lesisanyane 'moho le RSL ba fumanoe ba le mo-lato ke Lekhotla la Bosebet-si Lesotho qosong ea nyeli-so ea lekhotla kajeno. Ka hoo mookameli oa lekhotla leo Mohlomphehi Teboho Thoso, o ile a ba fa kotlo ea ho ea hlola chankaneng matsatsi a 30.

O tsoetsepele hore mat-satsi ao a 30, a fanyehiloe ka pehelo ea hore baikar-abelli ba lokise phoso ea bona ka ho busetsa Adv. 'Mathabo Mokoko moseb-etsing.

Kahlolo e re Mokoko a busetsoe mosebetsing hofihlela nyoe ea hae e kapel'a lekhotla ea ho lele-koa mosebetsing e felile.

Nyoe ea teleko ea Mokoko ka thoko ho molao, e tla mameloa ke Mooka-meli oa Lekhotla la Boseb-etsi, Tebello Thoso.



Nthabeleng Seitlheko

E bile thabo e khaphatsehang ho sechaba sa Liphakoe moo Mohlomphehi Letona Mote-ane lebitsong la 'muso a neng a nehelana ka mekonteraka e il'o aha Borokho Tele, ka la 16 Tšitoe monongoaha.

Mekonteraka e tl'o qala khaho ea marokho a 'maloa e leng borokho ba Bolepeletsa Mjanyani le Mochotoane. Ma-rokho ana a tla qala ka khoeli ea Pherekhong 'me tebello ke hore ka nako ea likhoeli tse peli, a tla be a felile.

O re hore tšebetso ena e tle e fihle pheletsong ka nepo, ba tla sebelisa chelete e kaholimo ho M 30 Millione. O re tlhokahalo ea marokho metseng e ama bophelo ba sechaba 'me ona a senyeha a le mangata ka lebaka la lik-hohola le lipula tse ngata.

O re 'muso oa habo o ike-

miselitse ka hohle-hohle ho sireletsa sech-aba le ho bona hore metseng eo se phel-ang ho eona se phela ka bolokohi hore qetellong se nolofalloe ke motsamao, ho phetha mabaka le ho fihla litšebeletsong habonolo.

Mohlomphehi Letona la Temo, Kanetso ea Lijo le Phepo e Nepahetseng, ebile e le Mokhetsoa oa Moyeni No. 65, o hlalositse a thabile hobane karabo e fihle sechabeng sa habo. A re ho bile le koluoa ea marok-ho a mabeli a ileng a nkoa ke likhohola e etsahetseng khoeling e fetileng; eaba bo-holo ba sechaba bo qalella ho thatafalloa ke motsamao.

E mong oa baahi sebakeng sena, Raleneha Hlasoa o hlalositse hore joaloka motho ea latang thepa Afrika Boroa o ne a thatafalloa ke ho etsa mosebetsi hobane hore a phethe leeto o ne a lokela ho emela hore metsi a theohe.

O re litšebetso tse 'maloa ba lokela ho fihla ho tsona ba tšetse marokho ao empa ba leboha 'muso ka ho ba ela hloko ho-bane le bona ke bakhethi joaloka ba bang.

O itse u buisoa sena ke hobane metseng e meng kapa literekeng lintlafatso li kena lenyene-nyene. A tšepisa hore ba tla ba-balla thepa eo hobane e molemong oa bona.



Bookameli bo tsebisa sechaba hore kamor'a nako e telele ho sa hatisoee koranta, joale ho fihletsoe qeto ea hore e boele e hatisoee mafelong ana a selemo ka tšepo ea ho tsoelapele isao.

Bookameli bo lakaletsa bohle Keresemese e monate le mahlohonolo a selemo se secha.

LESOTHO CATHOLIC BISHOPS' CONFERENCE

CATHOLIC SCHOOLS' SECRETARIAT

P.O. Box 80, Maseru 100, Lesotho, Southern Africa

E-mail :bmossuo@lcbc.org.ls

Office of the Educational Secretary

ADVERTISEMENT FOR VACANCY IN CATHOLIC SCHOOLS' SECRETARIAT

Applications are invited from suitably qualified candidates for the following position tenable in the Teaching Service in Catholic Schools Secretariat.

JOB TITLE	:	ASSISTANT EDUCATIONAL SECRETARY
NO. OF POSITION	:	1
DEPARTMENT	:	CATHOLIC SCHOOLS' SECRETARIAT
NATURE OF CONTRACT:	:	PERMANENT
RESPONSIBLE TO	:	EDUCATIONAL SECRETARY

1. JOB DESCRIPTION:

- Is responsible for planning education research for Catholic Schools' Secretariat;
- Advises on policy formulation and implementation strategies for Catholic Schools' Secretariat;
- Co-ordinates activities related to educational data collection and analysis;
- Is in charge of all Catholic Schools' Secretariat records and documents in the registry;
- Is responsible for statistical and casual returns;

2. KEY DUTIES AND RESPONSIBILITIES:

- Plans and forecasts growth rates in Catholic schools based on data collected;
- Devises means of solving problems related to school growth and dropout rate in Catholic schools and advises on how to handle them;
- Reviews statistical reports and gives advice to Educational Secretary;
- Collects and keeps data on: Enrollment in Catholic Schools; Number of qualified and unqualified teachers; Available facilities; and Equipment and materials;
- Dispatches, receives and keeps statistical returns from school Principals;
- Collects, files and follows-up on Casual Returns;
- Keeps in safe custody all files and information related to Catholic Schools' Secretariat
- Controls file movement;
- Keeps an up-date the list and addresses of all school Principals;
- Deputizes the Educational Secretary as and when requested;

3. KEY COMPETENCES AND SKILLS

The job requires a person who is conversant with statistical and research methods. It also requires a knowledge of filing system. High degree of concentration, memory and safety consciousness are required. Good interpersonal relations are needed especially in the tracing of files, documents and retrieval of documents. Computer literacy and Driver's license will be an added advantage.

4. QUALIFICATIONS

Bachelor of Science in Statistics or Bachelor of Arts in Public Administration.

5. SUBMISSION OF APPLICATIONS

Applications, including certified copies of relevant qualifications, two reference letters and copy of IDs, must reach Catholic School Secretariat on or before 15th January 2026.

Ba inoesa ka nkho



Nthabeleng Seitlheko

Letona la Metsi Mohlomphehi Mohlomi Moleko 'moho le balekane ba hae tšebetsong e leng Letona la Metsi le Bohloeki la Afrika Boroa, Mohlomphehi Pemmy Majodina ba bile leetong la matsatsi a mabeli la tlhahlobo ea mosebetsi oa Morero oa Metsi oa Lihlaba tsa Lesotho (LHWP) Phase II ho tloha ka la 14 ho isa la 15 Tšitoe 2025.

Ketelo ena e ne e re-retsoe ho lekola tsoelopele ea mosebetsi ea Phase II, ho qala Polihali le ho qetella Katse.

Letona Metsi le Bohloeki la Afrika Boroa, Pemmy Majodina o ne a tsamaea le Motlatsi oa Letona Lefapheng la Meralo, Tihokomelo le Tlhahlobo, ba boholong 'musong, litho tsa boto ea Trans-Caledon Tunnel Authority (TCTA) le Motsamaisi e Moholo (CEO) oa eona, 'moho le baemeli ba Rand Water Board, e leng moreki e moholo ka ho fetisisa oa metsi a LHWP.

Ha Letona la Metsi Mphlomphehi Mohlomi Moleko eena a ne a tsamaea le Mongoli e Moholo oa Lekala la Mehlooli ea Tlhaho, baemeli ba Lesotho Highlands Water Commission (LHWC), Boto ea Batsamaisi ea LHDA le bookameli bo boholo ba LHDA.

H'a amohela matona Setsing sa Tšebetso sa Polihali, Motlatsi oa Molula-Setulo oa Boto ea LHDA, Mofumahali Kanthimathie Rattay o totobalitse hore ketelo ena e bontša bohlokoa bo boholo ba LHWP e le motheo oa polokeho ea metsi tikolohong, tlhahiso ea matla, le sesosa se seholo sa ntšetsopele ea moruo le sechaba linaheng ka bobeli.

Mofumahali Rattay, 'moho le Motsamaisi e Moholo Monghali Tente Tente le sehlopha sa hae, ba hlalositse tlaleho ea tsoelopele ea Phase II. Lintlha tsa bohlokoa li kenyeletsa ho atamela qetellong ha khaho ea Borokho ba Senqu, tsoelopele ea lebota la Letamo la Polihali ho fihla boemong ba 1,977.

Tsoelopele e kholo mosebetsing oa Polihali Transfer Tunnel ea likilomithara tse 38, moo mochini oa ho cheka (TBM) ka lehlakoreng la Katse o seng o chekile ho feta likilomithara tse 2, ha TBM ea Polihali

e ntse e itokisetse ho qala mosebetsi mathoasong a selemo se secha.

Tlaleho e boetse e supile ho thehoa ha menyetla ea mosebetsi e fetang 14,000 e akaretsang basebetsi ba nang le litsebo, ba mahareng le ba se nang litsebo, tsoelopele ea Lenaneo la Bacha ba Litsebi (Young Professionals Programme), merero ea ho khutlisetsa bophelo ba sechaba (livelihoods restoration), 'moho le mehato ea paballo ea tikoloho.

Boetapele bo boetse bo buile ka liphepetso tse teng, tse kenyeletsang tiehiso ea

mosebetsi, mathata a likamano tsa basebetsi le ho se latele melao ke mekonteraka.

Qetellong ea letsatsi la pele, Mohlomphehi Mohlomi Moleko o bontšitse khotsofalo ka tsoelopele ka kakaretso, 'me a tiisa boitlamo ba Lesotho ba ho phethahatsa morero ona LHWP, ka matla phephelo ea metsi, tlhahiso ea motlakase, ntšetsopele ea noesetso, ntlafatso ea litlhapi le kholo ea bohahluli.

Letsatsi la bobeli le ile la tsepamisa maikutlo mosebetsing ea Letamo la Katse, moo matona a ileng a lekola

tsoelopele ea Katse Lodge, sebaka sa lihahlo le sa likoloi tsa bohahluli (campsite le caravan park), hammoho le sebaka sa TBM sa Ha Bereng, ho kenyeletsa feme ea likarolo (segment factory) e hlalising likarolo tsa konkreite tse lokiselitsoeng ho sebelisoa.

H'a phethela leeto lena Letona la Metsi le Bohloeki la Afrika Boroa, Mohlomphehi Pemmy Majodina o amohetse tsoelopele e entsoeng empa a hlalisa matšoenyeho ka tieho ea likarolo tse ling. A re ba rata ho bona morero ona o atleha hobane o arabela litlhoko tsa linaha tse peli.

O khothalelitse LHDA ho netefatsa hore phephelo ea metsi e fihla ka 2029. O netefalitse hore mebuso ka bobeli e ntse e hlaloba mekhoha ea ho nolofatsa hore na metsi a fihla joang sechaba se phelang haufi le matamo a morero le Profinseng ea Free State Afrika Boroa. O boetse a eletsa Rand Water le bo-masepala ba Gauteng hore ba itokisetse meaho ea ho amohela phephelo e eketsehileng ea metsi ho tsoa Phase II.

Ketelo ena ea tlhahlobo ke ntšetsopele ea ketelo e tsoanang e ileng ea etsoa Polihali ka khoeli ea Phato 2025 'me e tiisa boitlamo ba mebuso ka bobeli ba ho beha leihlo ka hloko le ho lekola tsoelopele ea Phase II ea LHWP.

Le ela hloko boieane

Nthabeleng Seitlheko

Lekala la Tikoloho le Meru ka tšebeliso le Lekala la Lichelete le Moralo oa Ntšetsopele, hammoho le Lenaneo la Machaba a Kopaneng la Ntšetsopele (UNDP), le thakhotse Biodiversity Finance Initiative (BIOFIN) Lesotho. Tsena li bile ka la 15 Tšitoe monongoaha.

BIOFIN ke lenaneo la lefatše lohle le tšehetsang linaha ho tseba, ho bokella le ho laola ka botsitso mehloli ea lichelete e hloka-halang ho sireletsa boieane ba tlholeho le ho matlafatsa botsitso ba tsamaiso ea tlhaho.

Lesotho morero ona o tla bapala karolo ea bohlokoa ho tšehetsa tšebetsong ea leano la naha la boieane ba tlholeho le Moralo oa Tšebetso oa Boraro (NBSAP III), ka ho thusa ho koala lekhalo la lichelete tse hloka-halang sebakeng sa tšireletso ea boieane ba tlholeho.

Ke hona tšebetsong ea morero ona ho tla theoa mosebetsi ea mantlha le

liphepho tse lebelletsoeng tsa Morero oa BIOFIN Lesotho (2024–2028). Tsena li kenyeletsa tlhahlobo ea maano le mekhatlo, tlhahlobo ea tšebeliso ea lichelete tse lebisitsoeng ho boieane ba tlholeho, tlhahlobo ea litlhoko tsa lichelete hammoho le ho thehoa ha moralo oa naha oa lichelete tsa boieane ba tlholeho.

Ketsahalo e boetse e totobalitse ka moo morero ona o tla matlafatsa bokhoni ba naha ho kopanya litaba tsa boieane ba tlholeho mererong le likhakanyong tsa lichelete mafapheng a bohlokoa.

Letona la Lekala la Tikoloho le Meru, Mohlomphehi

Letsema Adontši o itse letsatsi lena le tsoaea mohato oa bohlokoa leetong la kopanelo la ho netefatsa tšireletso e tsitsitseng ea boieane ba tlholeho le ho beha e le tšiea ea mantlha ea ntšetsopele ea naha.

A re ha boieane ba tlholeho bo sireletsehile ho boloka bophelo bo botle ba sechaba, ka hoo bohle ba lokela ho ba le thuto e tebileng le kutloisiso ka bohlokoa ba boieane ba tlholeho ho qoba ho senya lihloliloeng hobane ke ka tsona lefatše le atlehang ho phela.

Motlatsi oa Moemeli oa UNDP, Taye Amsalu o totobalitse kamano e matla lipakeng tsa boieane ba tlhole-

ho, ntšetsopele e tsitsitseng le boiketlo ba sechaba sa 'Musu oa Lesotho. O ile a tiisa hore bophelo ba rona ba letsatsi le letsatsi, litsela tsa ntšetsopele le bokhoni ba rona ba ho mamella litlamorao tsa phetoho ea maemo a leholimo li itšetlehile ka moo re hlokomelang tikoloho ea rona ea tlholeho.

“Haeba re hlokomela tlholeho ea rona, le eona e tla re hlokomela. Boieane ba tlholeho ke bophelo ba rona, ebile ke motheo oa ntšetsopele e tsitsitseng sebakeng sa meloko ea kajeno le ea kamoso.” Ho rialo Amsalu.

A re o hlokometse hore Lesotho le ntse le tsoelapele ho amohela litumellano tsa machaba tsa tikoloho, 'me ha joale sepheo ke ho li kenya tšebetsong kahare ho naha le ho netefatsa hore li tisa liphetoho le lintlafatso tse bonahalang maemong a lehae.

Motheo oa sena ke ho matlafatsa lichelete tsa boieane ba tlholeho ho utloisisa mehloli e teng, ho tseba likheo, le ho aha mekhoha o kopaneng oa naha o etelletsoeng pele ke 'musu, ka tšebetso ea UNDP, sechaba sa Basotho le litsi tse ikemetseng.



Lihoai li hlokomelisoa ka FMD

Nthabeleng Seithleko

Ka lebaka la mocheso o phahameng, Lekala la Temo, Tlhahiso ea Lijo le Phepo e Nepahetseng ka Lefapha la Litšebeliso tsa Liphoofole, le hlahisitse sehlopha sa Tšebeliso sa Mafapha a Mangata (Multi-Sectoral Task Team) sa ho loantša lefu la tlhaku le molo-mo (FMD), ka la 16 Tšitoe monongoaha.

Letona la Temo, Tlhahiso ea Lijo le Phepo e Nepahetseng, Mohlomphehi Thabo Mofosi o boletse hore morero oa kopano ke ho hlahisa sehlopha se tla

thusa 'muso ho loantša lefu lena le ho sireletsa Lesotho ka potlako. A re liphoofole li lokela ho sireletsoa ka nako kaha ho sa ameha tsona feela empa le tikoloho le bophelo bo botle ba sechaba li ameha.

O re sehlopha sena se tla ba leihlo le nchocho le ho mamela moo e bang qholotso li teng haholo tsa lefu lena. Ka hoo a re ho bohlokoa hore balisana ba tlalehe ha ba bona matšoao a sa tloaelehang liphoo-folong joaloka makhopho.

Mongoli e Moholo oa Lekala la Temo, Dr. Khothatso Tsooana o ile a hlalosa lipheo tsa kopano, 'me a re e ne e shebane le ho



matlafatsa maano a 'muso



Litša tse morung ke tsa rona-MCC

Nthabeleng Seithleko

Lekhotla la Motse-Moholo Maseru (MCC) le hlalosa hore le bile Ha Matata, Makhoakhoeng, Ha Abia le Masianokeng ka sepheho sa ho ea hlahloba mobu joalokaha e le tšebetso ea bona ea letsatsi le letsatsi, ka la 12 Tšitoe monongoaha.

Ho fihleng ha MCC e re e fumane matšoao le lithupa tse hlangoeng kahar'a moru, e leng se bolelang hore libaka tse joalo ho na le motho/batho ba li tšoaileng le ho li hloaea sebakeng sa ho li aba ka mabaka le lithasello tse tsejoang ke bona.

E re e hlahella mona ho etsa tlhokomeliso ho Basotho hore libaka tse joalo, ke tsa MCC 'me ha ho motho/batho ba lumelletsoeng ho li aba ntle le Lekhotla la Motse-Moholo. Mang kapa mang ea etsang joalo o tloa molao, 'me a ka tjameloa ke liqoso Makhotleng a Molao.

MCC e hlokomelisa baetsi ba liketso tsena hore e ba beile leihlo le ho ba laela ho emisa botlokotsebe bona hang-hang. E boetse e ip-

iletsa ho sechaba ho emisa ho ntša lichelete tsa sona ho reka litša tse ajoang ka tsela ea mofuta ona kaha ho se molaong.

E re ha motho a ntša chelete ho abeloa mobu ka tselena a tsebe hore a ke ke a fumantšoa lengolo la kabo ea mobu o joalo le lease, e

joalo.

“Ho ba seng ba ntšitse chelete ho abeloa mobu o joalo, re ba kopa ho itlaleha kapele liofising tsa Sepole-sa tse liofising tsa Lekhotla la Motse Moholo tse fumanehang Moonstar Complex.”

Sebakeng sa tataiso ma-



leng tsona tse tiisang hore mobu o joalo ke oa motho. Hape a ke ke a thusoa kae kapa kae mabapi le mobu o

bapi le kabo e nepahetseng ea Mobu u ka etela ofisi ea MCC ea litša har'a beke nakong ea lihora tsa tšebetso.

a thibelo le boitokisetso khahlanong le lefu lena. O totobalitse hore FMD ke lefu le tšelang meeli, le amang liphoofole le mekhoha ea boipheliso ea mahaeng.

O re ka lebaka la boemo ba Lesotho le ho ameha ha liphoofole, naha e tobane le kotsi e kholo, ka hona ba nka karolo ba batla ho theha leano le kopanetsoeng la thibelo le ho matlafatsa tlhokomelo ea mafu tikolohong.

Mookameli-Kakaretso oa Lekala la Temo, Dr. Relebohile Lepheana o hlalositse hore lefu lena le ama haholo likhomo, linku le lipoli, 'me le hasana ka potlako haholo. O boetse a re Lesotho le kile la emisa maemo a mang ka lebaka la liteko tsa liphoofole.

O re leha ho le joalo, ho fihlela joale naha e ntse e boloka boemo ba ho se be le FMD, feela Lesotho le ntse le le kotsing e kholo kaha le itšetlehile haholo ho Afrika Boroa.

Ho feta moo, o hlalositse litlamorao tse ka bang teng haeba ho ka hlaha FMD, tse kenyeletsang ho lahlehela ke menyetla ea 'maraka oa boea hammoho le litšenyehelo tse phahameng tsa taolo ea lefu, ente, lithibelo le mehato ea ho behella ka thoko.

Qetellong o khothalelitse Basotho ho latela ka tieo melao e laolang ho kenya liphoofole tse ka tšoarang ke lefu lena, ho etsa liteko ka potlako, ho theha libaka tsa tšireletso le ho netefatsa hore ho na le leano la tšohanyetso (contingency plan).

Lekala la Temo le netefalitse hore le nka karolo boitlamngoa ba bona ba ho sireletsa maemo a bophelo ba liphoofole, le ho tšehetsa tšebetso ea melao ea taolo ea motsamao oa liphoofole.

Tebello ke hore Lekhotla la Matona le amohela ka molao Sehlopha sa Tšebeliso sa Mafapha a Mangata.

<https://whatsapp.com/channel/0029VaksSPUJUM2dmiGDNh20>

Follow Moeletsi oa Basotho

Official WhatsApp Channel

and stay connected!


Fumana litaba tsa morao-rao, litsebiso, likhatiso le tse ling ka potlako ka menoana feela!

WhatsApp: 6260 0983

www.moeletsiabasotho.co.ls

MOB KIDDS EDUTAINMENT

Puzzle MoB 93-4616-17, 94-4618



Across


- 5 Motho ea balehileng ntoeng. (7-5)
- 6 Mohalikoane oa poone o sitsoeng o tsoakiloe le tsoekere le letsoai. (6)
- 7 Lenyalo la.... ke leo mosali a nyalloang ho etsa bana feela. (4)
- 9 Khomo ena e ntšo bo lefifi. E..... (6)
- 11 Ha mosali a hlokahetse, monna o nyala moena oa mosali oa hae. (2-2-4)
- 12 Khoeli ea boraro ngoetsi e tlotsoe ke khoeli.(9)
- 14 Lenyalo la ke leo monna a nyalang bana ba motho. (7-1-5)

Down

- 1 Mokopu o besitsoeng. (16)
- 2 Khoeli eo ngoetsi e isoang setsoetse ka eona. (7)
- 3 Letsatsi la tsoalo ea Jesu. (10)
- 4 'Mino o monate. (5-6)
- 8 Ha moshanyana oa lelapa a ile a hlokahala a sa fokola, ha thaka tsa hae

- li nyala, lelapa le ntša likhomo ho nyala mosali ea tla ba etsetsa ngoana. (7)
- 10 Lieta tsa letlalo la phatla ea khomo. (7)
- 13 Lapeng leo ho se nang ngoana e motona, e ba batsoali ba ntša likhomo ho fumana ngoetsi. (6)

THAROLLO MoB 93-4615



Monongoaha ha se ngoahola



Nthabeleng Seithleko

Borokho ba Senqu bo botelele ba limithara tse 825 bo ahiloe tlas'a Morero oa Khaho ea Letamo la Polihali kahar'a Morero oa Metsi oa Lihlaba tsa Lesotho (LHWP) Phase II 'me bona bo lebeletsoe ho thakhola ka khoeli ea Hlakola isao Seterekeng sa Mokhotlong. Litaba tsena li hlaheletse ketelong ea Letona la Metsi Mohlomphehi Mohlomi Moleko le Letona la Metsi le Bohloeki la Afrika Boroa Mohlomphehi Pemmy Majodina, ka la 14 Tšitoe monongoaha.

Borokho bona ke e meng ea meaho e meholo ea bohlokoa ka ho fetisisa morerong ona, 'me bo nkoa e le phetoho e kholo bophelong ba baahi ba libaka tse pota-potileng sebaka sena.

Letona la Metsi, Mohlomphehi Mohlomi Moleko o itse o motlotlo ke khatelopele e seng e fihletsoe ke morero hoba e ho tli'arabela lithoko tsa sechaba, ho fetola boemo ba moruo hape le batho ba tli'anolofalloa ke ho nka maeto. O re bo teng ba borokho bona le hore ebe haufi bo tla thakhola semolao ho netefalitse hore batho ba sebetlang morerong ona ha ba phomole hobane ba hloka katleho ea ona. O re e le 'muso ba rata ho bona Basotho ba una molemo kahar'a merero le ho ntlafala hore ho etsoe se nepahetseng.

Letona la Metsi le Bohloeki Afrika Boroa, Mohlomphehi Pemmy Majodina o hlalositse a thabile ho bona boiphihlelo khahong ea borokho

bona, ka le reng takatso ea bona ke ho bona tšebetso e tsoelapele. O re ba sebelisa chelete e ngata ho etsa morero ona, ka hoo ba loke-

lokela ho chaisa kapele hobane ho bata.

"Ha lehloa le khethile ne re lokela ho emisa tšebetso, ha e le likhohola tsona

ncha ho batho ba Mokhotlong. Ka lilemo tse ngata re bile le mathata a ho fihlela litšebetso tsa mantlha ka lebaka la maemo a leholimo le likhohola tsa Noka ea Senqu. Khaho ena e tla nolofalletsa hore baithuti ba fihle likolong ha bonolo, sechaba se fihle Letsing tsa Bophelo mebaraka le litšebetso tsa 'muso, leha maemo a leholimo a ka fetoha." Ho boletse Chaba.

E mong oa bacha ba Mokhotlong Moliehi Nkhabu o hlalositse hore borokho bona bo tli'o fetola bophelo ba letsatsi le letsatsi ba batho ba moo. "Re bile le mathata a maholo haholo nakong ea lipula le mariha. Borokho bona bo tla re thusa hore re fihle Letsing tsa Bophelo ka nako le litšebetso tse ling ka nako, hape re tsebe ho tsamaisa lihlahisoa tsa rona tsa temo le tsa khoebo habonolo." Ke Nkhabu eo.

Nkhabu o boetse o bontših-

mesebetsi le bohahlauli, kaha batho le thepa li tla tseba ho tsamaea habonolo ho sa tsotellehe maemo a leholimo.

Ho feta moo, khaho ea borokho ba Senqu e thehile mesebetsi ho baahi ba moo, ho kenyeletsa basebetsi ba nang le litsebo, ba mahareng le ba se nang litsebo. Bacha ba bangata ba fumane koetliso le boiphihlelo mosebetsing ona; ka ho ba bulela menyetla ea mesebetsi le ntšetsopele nakong e tlang.

Borokho ba Senqu ba limithara tse 825 bo tsoaea mohato oa bohlokoa ntšetsopele ea Morero oa Polihali le LHWP Phase II, kamoo merero e meholo ea naha e ka tlisang liphetho tse bonahalang bophelong ba sechaba sa ka lithabeng.

Borokho bona bo ahiloe ke sehlopha sa likampani se bitsoang WRES Senqu Bridge Joint Venture, e nang le baahi ba tsoang Le-



la ho susumetsa ba etsang mosebetsi hore ba u etse ka nako.

Borokho ba Senqu bo suptjoa bo hokahanya metse e neng e arohantsoe ke Noka ea Senqu ka lilemo tse ngata. Borokho bona ba limithara tse 825 bo ahiloe ho latela maemo a phahameng a bo-ramehlale (Engineers), bo etselitsoe ho mamella maemo a thata a leholimo a lithaba tsa Mokhotlong, ho kenyeletsa pula e matla, serame le likhohola.

E mong oa Mekonteraka e sebelitseng khahong ea borokho bona, o hlalositse hore ha b'a lieha ho qeta ho latela litsebo le mesebetsi ea bona. A re ba ile ba kopana le qholotso nakong ea Mariha moo ba neng ba

li ne li sa re ame ho latela tšebetso ea rona." A rialo.

A re ba thabile hore ebe ba fihlile boemong bona, 'me o tšepisa hore haufi borokho bona bo tla buloa kaha bo se bo phethetsoe ho setse hore ba qetelise lintho tse fokolang.

Koranta e bile ea buisana ka mohala le 'Musi oa Setere sa Mokhotlong ho utloa maikutlo a hae ka tšebetso ena e seng e fihletsoe, ka la 16 Tšitoe monongoaha, Tšepa Chaba ea hlalositse a thabile ho bona tsoelopele. A re ke mohato oa bohlokoa haholo ntšetsopele ea setereke sena se leng har'a libaka tse hle kahar'a naha.

"Borokho bona ba limithara tse 825 bo tliisa tšepo e

tse tšepo ea hore borokho bona bo tla bula menyetla e mecha ea moruo, ho kenyeletsa khoebo ea lehae,

sotho, Afrika Borwa le Italy Zutari (pejana Aurecon) e etsa moralo le tlhokomelo ea khaho.





TSA KEREKI

Barali ba etela Lebraton House



Tšeliso Thakholi

Barali ba Kopano ea Pelo e Tlotlehang ea Jesu ba Tikoloho e Kholo ea Maseru, ba ile ba etela baprista ba Maoblata ba seng ba holile le ba kulang, ba phelang Lebraton House, Mazenod ka Sontaha sa la 14 Tšitoe monongoaha ka sepheo sa ho ea ba hloela, ho ba fa limpho pele ho Keresemese le ho ba lakaletsa bophelo bo botle.

Har'a limpho tse ngata tse fanoeng li kenyeletsa lisepa tse hlapang; tse hlatsoang, lipompong, likerese, lijo tse ka makotikoting, rice, litho-loana, oli e phehang, matsoai le tse ling tse ngata. Ho ea ka Motlatsi oa Mookameli oa Komiti e Kholo ea Tikoloho ea Maseru, Mofumahali 'Makatiso Moshoeshe o re mosebetsi ona o moholo oa boapostola oa ho hlokomela matlo a baprista ba seng ba holile le ba kulang ba o etsa selemo le selemo bekeng ea bobeli ea Tšitoe.

A re kamehla ba ee ba qale pele ka ho etela Ntlo ea Baprista ea St. Joseph Parishing ea Ha 'M'a Jesu,

Roma empa monongoaha ba ile ba fumana tlaleho ea hore ha ho na baprista ba lulang teng, ke ha ba tla qala koano Lebraton House. A re hangata pele ba etela matlo ana ba ee ba kope ba ikarabellang ho fana ka litlhoko tsa mantlha tseo baprista ba phelang matlong ana ba li hlohang, e be ba se ba tlatselletsa ka limpho tse ling tse ngata tse tsoang botebong ba lerato la lipelo tsa bona.

E mong oa Barali ba Pelo

ikutloa a tletsoe ke thabo e khaphatsehang hobane ba o etsa ka lerato le tsoang botebong ba lipelo tsa bona.

"Rea le leboha bo-Ntate ba rona kaha le ile la khatha tema ena bocheng ba lona. Rea le rata ebile re ntse re le rata leha le se le holile ha ba bang ba se na bophelo bo botle. Ka lebaka lena re mpa re re Keresemese e monate le selemo se secha, 'me Molimo a 'ne a le baballe ho fihlela re kopana hape selemong se tlang."



e Tlotlehang, ho hlaha 'Mishoneng oa Pelo e Tlotlehang, Mofumahali 'Mampiti Matsoso o lebohile le ho lebohela Barali ba Pelo ka ho fuoa monyetla oa ho tla hloela baprista ba bona le ho tla etsa mosebetsi ona o motle oa boapostola oa ho tla hloela bakuli, 'me a re o

Ke eena eo.

Haele Bro. Leonard Libe OMI, ea ikarabellang le ho hlokomela maqheku le bakuli o ile a amohela bohle ka mofuthu le ho ba leboha ka mosebetsi o motle oo ba ntseng ba o etsa selemo le selemo oa ho thusa matlo ana a baprista.



2025-2026 SELEMO A

Sontaha sa 4 sa Advente



Isaia 7:10-14
Pesalema 23
Ba-Roma 1:1-7
Matheus 11:2-11

Khothatso



Keresemese e haufi

Re se re atametse haholo tsoalong ea Kriste, ho setse matsatsi a se makae re amohela ngoana Jesu, empa lintho li ngata haholo tse batlang nako ea rona. Sena se qetella se entse hore re fe bophelo ba moea nako e nyenyane. Thuto ea Pele e Pele e Profeta tsoalo ea lesea le bohlokoa haholo; ngoana ea tla bitsoa Emmanuel ke ho re: "Molimo o na le rona." Lengolo ho Ba-Roma moo Paulosing a buang le Bakriste ba Roma bao a ba nkang ba e-na le botho le metso ea Bo-Molimo ba Kriste. Evangeling Josefa; monna ea lokileng o bolela hore Maria o tla emoa ngoana ka matla a Moea o Halalelang, 'me mosebetsi oa ngoana ke ho tla lopolla sechaba libeng tsa tsona.

Bakriste ba bangata ba tsoentsoe haholo ke tsela eo Keresemese e seng e fetohile 'maraka kateng sebakeng sa batho ba likhoebo. Ha re nkeng hore tsela eo re ketekang nako ena ka eona e ne e ka beoa kapel'a lekhotla, ha re shebeng lintlha tse peli ke tsena; ea pele e tla ba e khahlanong ebe ea ho qetela ke e tšehetsang maikutlo ana, ebe ho qetella kahlolo.

'Nete eo ho seng motho ea ka e balehang ke ea hore ka nako ea Keresemese re'a reka, le hona re'a reka re tlohetse papali. Chelete eo esale re e bokeletsa ho tloha ha selemo se qala ka khoeli ea Pherekhong, e tlo fella kaofela ha eona ka letsatsi le le leng. Re na le polelo eo ke nkang e le matšeliso a se nang phofo e bile e hloholetsa boitsoaro bona: "Rea iteboha." Batho ba re esale ba sebetsa kathata selemo kaofela joale b'a iteboha: ntja e ja matla a eona.

Motho le motho o shebana le eena le lelapa la hae, ho rekela bana liphahlo le lintho tseo ba sa li hlokenng, lijo tsane tsa mokhatlo le tsona li teng li ngata fela li re tletse mahlo. Ho phehoa lijo tsa mofuta o le mong ka nako e 'ngoe, ho thoe khale re sotlile re ke re inyakalatse. Ha ho moo mafutsana le bahloki ba behoang teng. Ho bona nako ena ke ea lillo le littlalo hobane e ba hopotsa nako e fetileng e kileng ea e-ba monate bophelong. Ba se ba e keteka ka mehopollo feela le ho shebella ba nang le hona ba etsa tjela-mahlong.

Leha ho le joalo, Keresemese ke ketsahalo e kholo eo re hopolang boinamafatso ba Kriste ea tlieng lefatšeng ho khutlisetsa seriti le Bo-Molimo boo re bo thuntheliseng le ho bo silafatsa ka libe tsa rona. Joale re se re ka bitsoa bana ba Molimo, ka lebaka la Mor'a hae a tlieng ho tla re lopolla. Re tla lumellanang bohle hore re ka ikutloa re le inotsi, empa ke nako e ntle eo re ka kopanang le Kriste hobane o tla re etsa metsoalle ea hae.

Ho boetse ho na le poelano nakong ena, malapa a kopana; ba sebet-sang libakeng tse hole ba tla hae le bane bao re ba bitsang makholo ka nako e 'ngoe ba hopola hae. E le hore ha ho hobe hakaalo kannete, ho ntse ho e-na le lintle tseo re ka li supang. Le lintloa li'a emisa leha e ka ba ka nako e khutšoanyane haholo empa khotso e ba teng. Le mafutsana a ntse a hopoloa ka ho fuoa liaparo le lijo; mohlala e ka ba mahae a likhutsana kapa a maqheku le maqhekoana a hopoloang haholo ka nako ena.

Ehlile hoa jeoa le ho nooa haholo, mohlomong ho feta tekanyo feela batho ha ba thabile ba bile ba keteka ba ee ba ithabise ka lijo le lino. Kriste o teng har'a rona ka limpho tsa hae tsa tšepo, thabo, khotso 'moho le khanya, joale na re lokela ho sosobanya lifahleho?

Kahlolo ha se ntho e tlo ba bobebe ho hang, bonyane ka lehlakoreng la ka, lebaka ke hobane ha re fela lipaki tsa mofapahlolo nyeoeng ena, empa re babelaelloa ebile re baahloli. E mong le e mong oa rona o kentse letsoho mokhoeng oa ho keteka tsoalo ea Morena. Ka lebaka lena, uena a k'u iketsetse kahlolo ea hau hore na ha e le hantle re lokela ho keteka Keresemese joang. Har'a lintho tsohle tse etsoang kapa tse neng li etsoa khale ebe ke life tseo u li ratang haholo? U ka ba ua eketsa ka tse ling kapa ua fokotsa hore u fe Mokete ona moelelo o tla ba molemo ho batho bohle, e se karoloana e itseng feela. Kriste o thabela ha bana ba hae ba arolelana tsohle; lillo le thabo.

Bahalaleli har'a Beke

22	Tšitoe	Zeno
23	Tšitoe	Vintila
24	Tšitoe	Tarsilla
25	Tšitoe	Alburga
26	Tšitoe	Stephen
27	Tšitoe	Nicarete

Cape Verde e'a phunyeletsa

Tšeliso Thakholi

Kamor'a hore Naha ea Lesotho e hlolehe ho phunyeletsa ho ea lipapaling tsa Mohope oa Lefatše ka ho hloloa ke Nigeria le Afrika Boroa ka tatellano mahareng a khoeli ea Mphalane monongoaha, Naha ea Cape Verde e neng e nkuoa e le mopukunyane bolong ea maoto tikolohong ea Afrika, e entse khoba ka ho atleha ho kena lipapaling tsa Mohope oa Lefatše tse il'o tšoareloa linaheng tsa Mexico, Canada le Amerika isao.

Ho ea ka lotho ea ka moo lipapali tsa Mohope oa Lefatše li tla bapala ka teng e entsoeng mafelong a beke a tsoa feta linaha li arotsoe ka mekhahlelo e 12 e bopiloeng ka linaha tse 'ne mokhahlelo ka mong, 'me Naha ea Cape Verde e Mokhahlelong oa H moo e tliil'o thulana le linaha tse matla joaloka Spain, Uruguay le Saudi Arabia e seng linaha tse kang Brazil, Germany le Argentina joalokaha barati ba bolo ba ne ba lekanya.

Naha ea Cape Verde e koetlisoa ke Monghali Pedro Leitao 'Bubista' Prito, monna oa Portugese ea ileng a sebetsa kathata haholo hore Naha ea Cape Verde e kene litholisanong tsa AFCON lekhetlo la pele ka selemo sa 2013. Ha e qala ho betla tsela ea eona ea ho ea Mohopeng oa Lefatše, e ile ea sasara Cameroon ka phafa ea 1-0, eare moo linaha tse ling tsa Afrika li sa ntseng li maketse ea bapala ka seahlolo ea 3-3 le Libya, 'me ea nt'o qetella ka ho pola Eswatini 3-0.

Tšepo e kholo ea hore Cape Verde e tliil'o itsamaela bolacha ho lihlopha tseo e pannoeng le tsona, ba e behile ho likhalala tse mathang moleng o kapele e leng Dailon Livramento le Willy Semedo. Bahlankana bana ba babeli ke bona ba ileng ba iketsa lenyokonyane ka lebaleng ha ba ne ba teteka Eswatini le ho e ntša litholisanong tsa Mohope oa Lefatše.

Ka thoko ho mona linaha tsa Afrika tse seng li phunyelelitse ho ea Mohopeng oa Lefatše ke Egypt, Senegal, Afrika Boroa, Morocco, Ivory Coast, Algeria, Tunisia le Ghana. Haele Cameroon, Nigeria, Gabon le DR Congo ke hona li ntseng li qetela lipapali tsa tsona. Tšepo e kholo ea barati ba bolo ho linaha tsa Afrika ba e bebile



ho Morocco le Tunisia hore ke tsona feela linaha tse ka atlehang ho fetela mekhahlelong e hlahlamang ea lipapali tsena.

Ho sa le joalo Naha ea Afrika Boroa eo e saleng e qetela ho kena lipapaling tsa Mohope oa Lefatše ka selemo sa 2010, ha li ne li tšoaretsoe Afrika Boroa moo Siphewe Shabalala a neng hlabe ntlha e ntle ka ho fetisisa ha ba ne ba bapala le Naha ea Mexico ba Mokhahlelong oa A moo ba pannoeng le South Korea le Mexico hape 'moho le naha e tla hlola Mokhahlelong oa D ho UEFA.

O kenella 'minong

Tšeliso Thakholi

Sotho Hip Hop ke 'mino o bona-halang o runya ka matla a maholo lilemong tsa morao tjena, 'me o ratoa haholo ke bacha le batho ba baholo. Mohlankana ea tsebahalang haholo selika-likoeng sa 'mino Edmond Roboro ke e mong oa ba ikakhetseng ka setotsoana 'minong oa Sotho Hip Hop ho o holisa le ho o matlafatsa ka ho sebelisa puo e mathemaloli ea Sesotho.

Roboro ea lilemo li mahareng o sebetsa ka matla a maholo ho phethisa toro ea hae ea ho fihla maemong a phahameng haholo le ho tsebahatsa 'mino oa hae oa Sotho Hip Hop kahare le kantle ho naha. Pusanong le motlalehi oa Koranta o boletse hore ho tloha hae-sale a qalile ho bina 'mino ona lilemong tsa ho feta, o se a qapile lipina tse ngata haholo tseo a li phafang ka hore ke tsa boemo bo holimo.

O re ha joale h'a e-s'o be le morero oa ho hlahisa letlapa le lecha kaha e le hona a sa nts'a phehile, 'me o tla ntša masutsa isao. "Ke batla ha ke tšola mona ke hlahella bathong ka 'mino oa ka ke hlahe ka ntho e se ka ka letho, eo batho ba se nang ho oma mathe ke ho

notsing ba hae hore h'a binele monate le ho itlhabolla feela empa o etsa khoebo e tla mo phelisa.

O itse o etsa khoebo ena ea hae ea 'mino ka kelello e chatsi ea ho bona hore na a ka e tsamaisa joang; ho atamela liqhoku tsa 'mino ka tsela e joang e le ho nka malebela. O re o sebetsa kathata hore 'mino oa hae o tsebe ho khahla litsebe tsa batho ba bangata e le hore o tsebe ho fumana botšehetsi bo bongata. "Ka hoo ke lakatsa hore libini tsohle tse ntseng li thuthuha joaloka 'na li tsebe ho phela ka 'mino." Ho rialo Roboro.

O re chebelo-pele ea hae 'minong ke e kholo kaha a hlile a batla ho fetola 'mino

khoebo kahare ho naha. A tiisa hore o sebetsa kathata 'minong e le hobane a batla hore a hlahelle kahare ho naha le machabeng, 'me seo se tliil'o etsahala kaha a bina 'mino oa boemo bo holimo o fupereng molaetsa o ka thabeloang linaheng tse ling.

A fera puo ea hae ka hore libini li lokela ho tlosa kelelong tsa tsona hore li ka se fihli linaheng tsa mose ka 'mino oa tsona. "Bona oa bona o fihla joang Lesotho le Afrika eohle?" O botsa joalo a bile a hlokomelisa libini tsa Lesotho ho se ipitsetse sekhobo seo li ka qetellang li se li hloka matla a hore li ka fihlela tse kholo ka 'mino oa tsona.



Se ba tšeremisa mangole



Tšeliso Thakholi

Leha Sehlopha sa Bolo ea Maoto sa Swallows se ile sa roba le ho nyotobetsa lipelo tsa barati le batšehetsi ba bolo, ka ho tlonlolloa kapel'a batšehetsi ba sona ke sa Quthing LMPS ka phafa ea 3-0 papaling ea ho qetela e koalang selemo e bileng Lebaleng la Swallows, Mazenod ka la 13 Tšitoe monongoaha, ha e'a sisinyeha boemong ba eona ba bone lokong.

Swallows e ntseng e le leetong le matla la ho khutlela lihlopheng tse kholo tsa liki, e ne e tšepile hore e tla koala selemo sena e le boemong ba boraro kamor'a ho bapala lipapali tse robong, moo e hapileng tse 'ne ea bapala ka ho lekana ho e le 'ngoe 'me ea hloloa ho tse 'ne.

Sehlopha sa Quthing LMPS seo e leng bompoli ba ngoahola ba Nedbank Cup, ha se'a sisinyeha maemong a sona lokong le hoja se hapile papali ea sona. Ka hona se matlafalitse lintlha tsa sona tseo se li hlabileng e le 14, 'me sa eketsa lintlha-khola ka ho bokeletsa tse 17. Ho fihlela ha joale se bapetse lipapali tse robeli, 'me sa hlola tse hlano, sa bapala ka ho lekana ho tse peli sa lahlehelo ke e le 'ngoe.

Ke papaling ea lihlopha tsena tse peli moo ho bonahatseng Swallows e ne e imetsoe hona hoo mola o kamorao o neng o phutla ka mokotla o metsi, 'me

qetellong Quthing LMPS e ileng ea fumana mokoko karolong ea pele ea papali. Ha moea oa papali o ntse o phahama sebakali sa Quthing LMPS sa fumana karete e khubelu ka lebaka la ho bapala ka bohlasoa.

Leha Swallows e ne e bonahala e sa ka ea nyahama leha e ne e shapuo 3-0, e ne e hlile e khathaletsa lipalong tsa Quthing LMPS hoo ka makhetlo a mararo e ileng ea hloloa ke lintlha tseo e neng e lokela hore e li lahletse ka letanteng. Leha ho le joalo, Quthing LMPS le eona e ne e sa itheka moralo hobane e ne e hlile e batla ho finyeletsa Swallows likobo molaleng.

Puisanong le motlatsi oa mokoetlisi oa Swallows, Monghali Molefi Mphutlane o hlalositse hore sesosa sa ho lahlehelo ke papali eo ke hobane ba ile ba tlaila moralo oa bona oa ho itlhophela papali eo. A re ntlha eo ba ileng ba e hlajoa e ile ea nonyetse mola o kamorao oa sehlopha, 'me ba qetella ba se ba sa bapale hantle.

A re bothata bo teng ha joale ke ho lahlehelo ke libapali tse ngata tse bapalang moleng o hare le o kamorao ka lebaka la ho ea mesebetsing ka ho fapakana ha bona. A tiisa hore ha ba khutla Keremeseng le Selemong se Secha ba tliil'o matlafatse sehlopha sa bona e le hore ba tle ba kene mokhahlelong oa bobeli oa lipapali tsaliki sehlopha sa bona se le matla.

Lijabatho e li hula pele

Tšeliso Thakholi

Ke lehlana-hlana la motima-hlaha lihlopheng tse kholo tsa bolo ea maoto tse loanelang ho hapa liki, ha tse ling tsona li tseka ho kena kahar'a lihlopha tse 'ne tse ka holimo lokong, mokhahlelong oa pele oa liki o seng o ntse o haba ho ea fihla pheletsong. Boholo ba lihlopha li se li saletsoe ke lipapali tse seng ka holimo ho tse 'ne, 'me ha ho sa na nako, e teng e lekane motinyane kaha isao li tla be li se li loanela ho ea tsoa khoeleng.

Ka nako e telele e ka fetang lilemo tse hlano ha nako ena ea Keremesese le mafelo a selemo, e atamela e ne e-ba barati le batšehetsi ba bolo ea maoto ba se ba ntse ba tseba hore sehlopha sa Bantu se li hula pele lokong, 'me taba ena e ne e se e fetohile ntho e kang tloaelo, empa linako li fetohile papali ea bolo Lesotho mona e nkile sebopelo se secha.

Sehlopha sa Lioli seo e

leng sona bompoli ba liki se sa tsoa shapa Lifofane ka thupa e bohloko ea 1-0 libekeng tsa ho feta, se shebahala se e-na le monyetla o fokolang haholo oa ho sireletsa mohope ha selemo sa lipapali se fihla pheletsong isao, ho latela ka moo se ntseng se bapala ka teng. Lioli e maemong a bobeli lokong kamor'a hore se tsoe ka lesoba la nale ha se ne se boela se hlohloa Majantja ka thupa ea 1-0 mafelong a beke a tsoa feta.

Haele Lijabatho e maemong a pele kamor'a ho bapala ka seahlolo sa 1-1 le Linare, papaling e neng e hlile e batla e leka-lekana ka 'mapalo e bileng Morija ka Sontaha. Ntlha ea pele ea Linare e ile ea hlajoa karolong ea pele ea papali ke Mofihli Mabokoane. Ha metsotsong ea ho qetela ea karolo ea bobeli ea papali Tsoarelo Mokoaleli a ile a etsa bonnete ba hore o lekanya lintlha e ba 1-1.

Ho tloha sehlopha sa Lijabatho se qala mokhahlelo oa pele oa lipapali tsa liki se qalile se bapala hantle haholo ka ho ipokelletsa ka lintlha le

ka likhalala le linaledi tsa bolo ho tsoa lihlopheng ka ho fapakana, 'me tello e khola ke hore ha Lioli e ka ba ea tlaila thifa se tla ikhapela liki isao ho latela ka moo se sebet-sang ka thata ka teng tlasa bokoetlisi bo hloahloa ba Monghali James Madidilane ea kileng a beha sehlopha sa Bantu 'mapeng ka ho ikhapela liki ka makhetlo a mane a latellanang.

Leha ho le joalo, ho sa le boima lihlopheng tse 'ne tse ka holimo lokong e leng Lijabatho, Majantja, Lifofane le Lioli kaha se seng sa tsona se tlameha ho hapa liki ha selemo se fela. Ha joale li sa ntse li fetolana feela ha ho e-s'o bonahale hantle hore na se tlang ho ba sona bompoli ke sefe. Ho feta mona lihlopha tse bonahalang li hula ka boima le ho ba tlokotsing e khola ea ho ka iphumana li rathiloe ke selepe ke tse sa tsoa kena liking e khola e leng Maroala le Members tseo e leng tsona tsa ho qetela lokong. Ho fihlela hajoale sehlopha ka seng se saletsoe ke papali e le 'ngoe pele se phethela se koala selemo sena.



Mazenod Tailoring
tailoring@mazenodprinting.co.ls
22 350 224
+266 50757585

Transforming your image is our Passion

Readily available